

Rapport 3/25 vun der Sportskommissioun

Reunioun vum 14.07.2025 um 18:00 an der Scheier zu Bëschdref

Presenzen

Member	Present	Entschëllegt	Net entschëllegt
Arendt Benoît	X		
Conrad Frank	X		
Everad Thierry	X		
Kieffer Aloyse	X		
Lesch-Fanck Laure		X	
Lucas Patrick		X	
Mathias Heike	X		
Majerus Yara		X	
Meyer Louis	X		
Reding Sam		X	
Reuter Pierre	X		

Punkt 1: Dagesuerdnung

Op der Dagesuerdnung stoungen follgend Punkten:

- Feedback vun der Visitt vum Léierpad am Fënsterdall
- Feedbackronn Sportleréierung + Nuit du Sport 25
- Schnuppercours Hierscht 25 (Functional Training)
- Divers

Punkt 2: Rapport vun der leschter Reunioun

De Rapport vun der leschter Reunioun gëtt unanime vun de Memberen ugeholl.

Punkt 3: Schnuppercoursen 2025

Schnuppercour Volleyball: Nodeems de President vum Biissener Volleyball-Club an der leschter Runioun op Besuch war, ass déi Iddi vun engem Schnuppercours am Volleyball aus verschiddenen Grënn net weider verfollegt ginn.

“Functional Training” mam Leandro: Dësen Schnuppercours ass souwäit organiséiert an den deementspriecheden Flyer gëtt am nächste Buet publizéiert. Als Resumé nach eng Kéier:

- Wéini: All Donneschden vun 19 bis 20 Auer
- Wou: An der Sportshal um Campus Helperknapp zu Bruch am Multisall ouni Spigelen
- Period: Vum 18.09.25 bis den 18.12.25
- Et ass keng Umeldung néideg

De Pierre suert dofir, dat de Leandro de Schlëssel kritt vum Steve Rollinger.

Laftreff “Vun 0 op 5 km” an “Vun 5 op 15 km”: De Pierre trainéiert nach weiderhin mam Grupp **“Vun 5 op 15 km”** iwwert de Summer hin. Hei lafen och déi mat, déi am Abrëll am Grupp **“Vun 0 op 5 km”** gestart sinn.

Den nächste Ufängergrupp **“Vun 0 op 5 km”** ass eréischt fir nächste Fréijoer geplangt fir dat de Pierre besser de Grupp **“Vun 5 op 15 km”** encadréiere kann. Wann awer elo interesséiert Ufänger matlafe wëllen, déi sollen sech awer mellen.

Am Kader vum Laftreff, huet d’Kommissioun den Accord ginn, dat T-Shirten fir den Ufängergrupp an d’Startgeld fir de Businessrun den 18. September vun der Kommissioun finanzéiert ginn. De Pierre freet sech natierlech doriwwer a seet Merci.

Weider Schnuppercoursen:

D’Kommissioun hat nach e puer aner Iddien gesammelt:

- Special Olympics (Everad Thierry): fënnt dobausse statt, méi opwendeg Organisatioun => Summer 2026
- Billard: De **Fränk** mengt, dat esou ee Schnuppercours ouni Weideres bei Bedarf organiséiert kéint ginn
- “Fit Kanner Helperknapp”: D’**Yara** huet hei Kontakt mat engem Sport Educateur deen interesséiert wär Sport speziell fir Kanner unzebidden. D’Kommissioun mengt, dat déi Persoun am Beschten säi Projet an enger Versammlung vun der Kommissioun virstelle sollt.
- Tauchen zu Miersch an der Schwämm: Hei wollt den Aly déi Iddi weider entwéckelen
- Mountainbike mat engem lokalen MTB-Club: De Benoit freet hei emol no ob Interesse wär.

Punkt 4: Sportleréierung an Nuit du Sport

D’Kommissioun zitt eng positive Bilanz vun der d’Nuit du Sport an der Sportleréierung vun dësem Joer.

D’Präsenz vun der Kommissioun an den Oflaf vun der Sportleréierung goufen hei ervirgehewen.

Liichte "Fine-Tuning" fir d'nächst Joer wär nach méiglech um Niveau vun:

- Verbesserung Riednerpult a Mikro
- Vlät e bësse méi fréi ufänken
- Eventuell d'Éierungen gruppéieren no Veräin
- Eventuell kenne Verrieder vun den Veräiner och ee kuerzt Wuert soen

D'Kommissioun freet sech elo ob d'Memberen vun den geéierten Equippen och hier Drénkfläsch als Cadeau kritt hunn.

Punkt 5: Gadgeten Gemeng Helperknapp

D'Gemeng hat proposéiert e puer **Gadgeten** ze beschafen, déi extra bei sportlechen Evenementer an och soss verdeelt kéinte ginn. D'Sportskommissioun huet an deem Sënn Drénkfläschen bei enger lokaler Minientreprise beschaaft. Déi Fläschen sinn elo bei der Sportleréierung un d'Sportifs méritants verdeelt ginn. D'Gemeng selwer huet sech em Mikrofaser-Dicher bekëmmert déi un déi d'Kanner verdeelt goufen déi bei der Nuit du Sport participéiert hunn.

Dëse Punkt ass also ofgeschloss, ausser et géif sech neie Bedarf erginn.

Punkt 6: Fitness Parcours an Outdoor Gym Openthalt/Fensterdall

De Schäfferot huet d'Iddi vun der Sportskommissioun begréisst, den Naturléierpad um Openthalt „upzedaten“ an mat engem Fitnessparcours ze kombinéieren. Dofir hunn sech e puer Memberen vun der Kommissioun den 2. Juni am Fensterdall getraff fir sech dee ganze Site emol sur Place unzekucken.

Hei e puer Fotoen vun der Platz:





D'Sportskommissioun huet ënner anerem zu deem Thema follgendes ugeschwat:

- De Léierpad ass allgemeng an engem schlechten Zoustand. Et misst awer machbar sinn domat ee Fitness/Lafparcours ze kombinéieren
- Um Site am Fënsterdall soll deemnächst een Projet vun Tinyhäuser gestart ginn. Wéi kinnt een en Fitnessparcours an dëse Projet integréieren?
- De Fierschter sollt eis nach Bescheid soen wat iwwerhaupt op deem Site méiglech ass.
- D'Sportskommissioun géing et begréissen, dass onofhängeg vun engem Fitneesparcours, d'Schëlde vum Léierpad eng Kéier propper gemaach sollte ginn.
- Et gouf och diskutéiert, ob ee Fitness oder Outdoor Gym am Kär vum Duerf z.B. op der Spillplatz zu Tënten oder op deem Multisportplaatze bei der Schoul zu Tënten net méi Sënn géif maachen.
- D'Iddi koom op, fir an der ganzer Gemeng verschidde Weeër fir Joggen a Wandere digital ze markéieren z.B. am Strava oder am Komoot. Mat der neidescher Publicitéit kinnt een d'Awunner aus eiser Gemeng motivéieren fir nei Weeër ze trëppelen oder ze lafen. Déi Iddi soll deemnächst nach weiderentwéckelt ginn => Weeër oflafen oder op Geoportail markéieren.

Punkt 7: Zukunft vum Mierscher Turnveräin

De Pierre hat dëse Punkt opbruecht, well hien e puer mol vu betreffen Elteren ugesprach ginn ass, ob d'Sportskommissioun an dëser Saach net intervenéieren kéint. Vill Kanner, och aus eiser Gemeng, sinn direkt vun der Opléisung vum Mierscher Turnveräin betraff.

D'Sportskommissioun begréisst d'Stellungnahm vun der Gemeng per email vum 13.05.25 zu dësem Sujet a wäert dëse Sujet net méi weider verfollegen virun allem wëll sech elo awer eng Léisung fir den Turnveräin erginn huet.

Punkt 8: Impuls-Event den 25.01.25

Dëse Punkt bleift nach am Rapport fir dat déi eenzel Iddien net esou séier vergiess sollte ginn.

De COSL an Zesummenaarbecht mam IANPS an der Oeuvre Nationale de Secours Grande-Duchesse Charlotte hat den 25.01.25 op hiren Impuls-Event zu Lëpschent agelueden. Hei gouf ee Projet presentéiert, deen an e puer Pilot-Gemengen gestart ginn ass fir de Sport an d'Bewegung op kommunalen Niveau ze fërdere. De Pierre huet d'Sportskommissioun vertrauden an eng Rei vun Iddie matbruecht:

- *Fitness Parcours an der Néi vun enger Maison Relais deen speziell fir Kanner geduecht ass*
- *Bewegungschallenge bei der Nuit du Sport*
- *Sportbox: dat ass eng Këscht déi z.B. bei enger Spillplaz eng Rei vun Sportartikelen (Fussball, Volleyball, Racketten, Sprangseel, ...) enthält a fräi verfügbar ass*
- *Bewegung dobaussen: Tour mat QR-Coden an Zesummenaarbecht mat engem CIPA*
- *Beliichte/Beschëldert Lafweeër an der Gemeng*
- *Bewegungskart vun der Gemeng: Hei gëtt op eng visuell uspriechend Aart a Weis déi sportlech Offer an der Gemeng op enger interaktiver Kart duergestallt. D'Kommissioun mengt, dat dës Iddi op alle Fall verfollegt soll ginn.*
- *Sportdag fir all Alter, speziell och fir eeler Matbewunner ze motivéieren*
- *Randonnée saine op engem Sonde moien mat Tier vun 7 bis 13km fir all Alter*
- *Sportskoordinator: Hei gëtt de Gemenge proposéiert mat finanzieller Hëllef vum Staat een Sportskoordinator anzustellen, deen speziell de Sport an d'Bewegung an de Gemenge promovéiere soll. Et besteet neierdénks ze guer d'Méiglechkeeten ee Coordinateur sportif fir e puer Gemengen anzustellen. D'Kommissioun encouragéiert d'Gemeng sech doriwwer Gedanken ze maachen well op esou eng Manéier de Sport an och d'Aarbecht vun der Kommissioun ausseruerdentlech géif profitéieren.*

Nächst Reunioun ass am Oktober 2025. De Benoit start eng Ëmfro fir den Termin.

Pierre Reuter

Sekretär Sportskommissioun